



Inatsisartut

Aningaasaqarnermut Akileraartarnermullu

Ataatsimiititaliaq

Finans- og Skatteudvalget

Ulloq/Dato:

7. august 2012

J.nr.:

01.31.06/12-00584

Aningaasaqarnermut Naalakkersuisoq

Pingasunngornermi ulloq 1. august 2012 Aningaasaqarnermut Akileraartarnermullu Ataatsimiititaliap aalajangenera pillugu Naalakkersuisunut ilisimatitsissut - Suliaq nr. 01.31.06/12-00584

Kalaallit Nunaata iluani ilaasunik, allakkanik nassiussanillu angallassinermut kif-far-tuunneqarnissamik isumaqatigiissutit nutaat.

Naalakkersuisut **inassutigaa**,

- Kontup pingaarnep 73.01.08-p ataani Kalaallit Nunaata iluani ilaasunik, allakkanik nassiussanillu angallassineq pillugu sullissit ilanngussa 2-mi taaneqartut isumaqatigiissusi-orfiginissaannut Naalakkersuisut Ineqarnermut, Attaveqarnermut Angallannermullu Naalakkersuisoq piginnaatissagaat. Isumaqatigiissutinut akigititassat siviussuserititassallu ilanngussa 2-mi takussutissiami allassimasutut ilusilerneqassaput.

Aningaasaqarnermut Ataatsimiititaliap oqaaseqaatai

Ulloq 31. juli 2012 Aningaasaqarnermut Ataatsimiititaliap ataatsimiititaliap ulloq 24. juli 2012 apeqqutaanut Naalakkersuisut akissutaat tiguai. Naalakkersuisut akissuteqaamminni paasissutissat saqqummiunneqartut piaartumik isummerfigeqqaat, tassami piffissamut 1. januar 2013-imiit nunatsinni ilaasunik angallassisarneq eqqarsaatigalugu neqeroorutit saqqummiunneqarsimasut attatiinnarnissaannut piffissarititaaq 1. august 2012 naasussaammat.

Ataatsimiititaliaq tamanna tunngavigalugu ulloq 1. august 2012 immikkut ittumik ataatsimiippoq suliassaq oqallisiginiarlugu. Ataatsimiititaliaq isumaqarpoq suliassami paasissutissat maanna naammalersut suliassami inaarutaasumik aalajangiisoqarsinnaalerluni.

Ataatsimiititaliaq suliassamut isummernermini avissimavoq.

Ataatsimiititaliami amerlanerussuteqartut, Olga P. Berthelsen, Finn Karlsen, Naaja Nathanielsen, Siverth K. Heilmann, Aqqaluaq B. Egede aamma Hans Enoksen (Per Berthelsenimut sinniisooq), Naalakkersuisut inassuteqaataat akuerisinnaangilaat. Amerlanerussuteqartut tamatumunnga tunngavilersuutigaa:

1. Ilaasunik angallassineq eqqarsaatigalugu kiffartuunneqarnissamik isumaqatigiissutissat aamma ujaasisarnermut annaassiniartarnermullu upalungaarsimaneq (SAR) pillugu naalagaaffiup Naalakkersuisullu akornanni isumaqatigiissutissaq imminnut ataqtigiilluinnarput, minnerunngitsumik nunatta Kujataa eqqarsaatigalugu. Ullumikkut upalungaarsimaneq ilaasunillu assartuineq qulimiguulik S-61 Air Greenlandip timmisartuutaaniit atorunnaarneqartussatut pilersaarutigineqartoq atorlugu tamarmik ingerlanneqartarput. Taamaattumik ataatsimut naliliiniarnermut pingaarutilerujussuuvoq ilisimassallugu ujaasisarnermut annaassiniartarnermullu upalungaarsimanermik isumaqatigiissut nutaaq atortut suut atorlugit ingerlanniarneqarnersoq, maannamutullu tamatumaa ilaasunik angallassinermut ataqtigiissinneqarnissaanut periarfissaqassaner-soq. Taamaattumik amerlanerussuteqartut ilaasunik angallassisarneq eqqarsaatigalugu

kiffartuunneqarnissamik isumaqatigiissutit akueriniangilaat, ujaasisarnermut annaasiniartarnermullu upalungaarsimaneq pillugu Naalagaaffimmik isumaqatigiissuteqartoqarsimatinnagu.

2. Qulimiguullit Bell 212-it, ilaasunik angallassineq eqqarsaatigalugu kiffartuunneqarnissamik isumaqatigiissuteqarnissamut tunngavigineqartut, aamma naatsorsuutigineqarpoq ujaasisarnermut annaasiniartarnermullu upalungaarsimaneq atattillugu atorneqartassasut. Qulimiguullilli taakku nunatta silaanut naleqqutinngilluinnarput, aqqutinut isorartunerusunut atorneqarsinnaanatik, kiisalu aamma ujaasinernik annaasiniarnernillu isumaginninnermi ikittuinnarneq ilaasoqarsinnaallutik, minnerunngitsumik amoortaatilerneqarsimagunik.
3. Kiffartuunneqarnissamik isumaqatigiissutit akuerineqassappata tamanna nunatta Kujataani suliffissaaleqinermik annertunerulersitsisussaavoq. Atorfiit Disko-line-imi Mit-tarfeqarfinnilu pilersinneqartussat sulisinnaasunut Air Greenlandimit soraarsinneqartussanut naammannaviangillat, soorlu aamma Disko Line sulisussanik imarsiornermik ilisimasaqartunik pisariaqartitsissasoq timmisartuussisarnermik ilisimasaqartunik pisariaqartitsinani. Taamaattumik sulisut qaffasissumik ilinniagallit nunatta Kujataanit nussulersinnaanerat annilaangatigineqarsinnaavoq piviusoq. Amerlanerussuteqartut kiffartuunneqarnissamik isumaqatigiissutit suliffissaaleqinermik annertusisitsissat nunap immikkoortuanit nussornermik pilersitsisinnaasut akuerisinnaangilaat.
4. Amerlanerussuteqartut annilaangatiqat kiffartuunneqarnissamik isumaqatigiissut nunatta Kujataa eqqarsaatigalugu ilaasunik angallassinermi naammassisaqarsinnaassutsumik ataqatigiissitsinermillu pisariaqartumik naatsorsuutigisariaqakkamillu pilersitsinaviangitsoq, naak Disko Line aamma Air Greenland siunertaqaraluartut "sapinnigisaq naapertorlugu" tikittarnissat aallartarnissallu ataqatigiissaarneqartarnissaannillu. Kiffartuunneqarnissamik isumaqatigiissut piffissat utaqqiviusut piffissallu angallaviusut sivitsorneqarnerannik kinguneqartussaavoq, imaatigut silaannakkulluunniit angalasoqarnera apequtaatinnagu.
5. Kiffartuunneqarnissamik isumaqatigiissutit akuerineqassappata nunatta Kujataani bilitsit akiisa annertuumik qaffariarsinnaanissaat annilaangatigissallugu pissutissaqarpoq. Nunatta Kujataani inuussutissarsiorneq sunnerneqartussaavoq, tassami taqqani ilaatigut takornarnianik angallassisartut misigisarsinnaammassuk angalannermi peqataatinneqaratik, soorlu aamma ilaasunik angallassineq eqqarsaatigalugu useqarsinnaasuseq naammannersoq annilaangatigissallugu pissutissaqartoq.
6. Kiffartuunneqarnissamik isumaqatigiissutini nunarput immikkoortunut aqqaneq-marlunnut agguataarneqarsimavoq. Ingerlatseqatigiiffiit ilaat ataatsimut sumiiffinnut assigiinngitsunut neqerooruteqarsimapput neqeroorutaallu ataqatigiimmata kiffartuunneqarnissamik isumaqatigiissutit ilaannaat immikkoortinneqarsinnaangillat taakku immikkut akueralugit. Taamaattumik amerlanerussuteqartut kissaatigaat ataqatigiittoqarnissaa eqqarsaatigalugu kiffartuunneqarnissamik isumaqatigiissutit ataatsimut isummerfigineqartariaqartut ataasiakkaarlugit isummersorfiginagit.
7. Amerlanerussuteqartut itigartitsinermikkut kissaatigaat angallannikkut aqqissuussinermik pitsaaneruseqarfiunngitsumik periarfissiisoqarnissaa, inuiaqatigiit ataatsimut aningaasaqarniarnerat akisussaasuseqartumik isiginiarlugu. Amerlanerussuteqartut isumaqatigiissutissatut missingiutit nutaat pillugit Naalakkersuisunik suleqateqarusupput tamatumalu malitsigisaanik aningaasatigut kingunerisassaasa periarfissiissutissaasalu oqallisiginissaannut tamakkiisumik piareersimalluni.

Naalakkersuisut oqaatigaat nunatsinni nunaqarfiit illoqarfyllu arlallit kiffartuunneqarnissamik isumaqatigiissutit akuerineqanngikkaluarpata 1. januar 2013-imiit angallannikkut isumagine-qarunnaassasut. Amerlanerussuteqartut taamatut nalunaaruteqarneq tutsuiginanngitsutut isumaqarfigaat. Nunatsinni angallassisarnermik isumaginnittut nalinginnaasumik annertuumik

akisussaaqataanerminnik takutitsisarput, amerlanerussuteqartullu naatsorsuutigaat matumani aamma soorunami inuiaqatigiinnut akisussaaqataanerminnik takutitsiumaartut angallassinermilu suliaasaat soorunami akilerneqarlutik naammassinissaat akueralugu, naak piffissap ilaanni aamma kiffartuunneqarnissamik nutaanik isumaqatigiissuteqartoqarsimangikkaluartorluunniit.

Amerlanerussuteqartut isumaqarput Naalakkersuisut ilaasunik angallassinermut tunngasuni kiffartuunneqarnissamik isumaqatigiissutinik suliaqaqqinnerminni Air Greenlandimik danskillu naalagaaffiannik oqaloqateqalertariaqartut, taamaaliornikkut qulimiguullit S-61-it pisoqalisut ilaasoqarsinnaassuseq, ungasissuliarsinnaaneq siunertanullu assigiinngitsunut soorlu ujaasinernut annaassiniarnernullu upalungaarsimanermut, ilaasunik assartuinnermut aamma uuliasiornermi aatsitassarsiornermilu suliaasanut assigiinngitsunut atorneqarsinnaanera eqqarsaatigalugit taamaaqataannik taarserneqarsinnaaniassammata. Amerlanerussuteqartut soorunami nalunngilaat Namminersorlutik Oqartussat Air Greenlandimi ikinnerussuteqarlutik piginneqataassutit 37,5 procentiinik piginneqataasutut peqqusinnaanngimmassuk.

Amerlanerussuteqartut taamatuttaaq oqaatigissavaat ilaasunik angallassineq eqqarsaatigalugu kiffartuunneqarnissamik nutaanik isumaqatigiissutissanut inaarutaasumik killiliussassanik aalajangersaasoqartinnagu taamatullu aamma ujaasisarneq annaassiniartarnerlu eqqarsaatigalugit isumaqatigiissuteqartoqartinnagu inuiaqatigiinni tamani angallanneq pillugu oqallinneq sukuumiinerusooq tamakkiinerusorlu pisariaqartutut isigigamikku.

Amerlanerussuteqartut ilisimaaraat angallanneq eqqarsaatigalugu isumaqatigiissutissat pitsanngorsarneqarnissaannut amerlanerussuteqartut kissaataat naammassineqassappata tamanna angallannermut tunngasunut massakkorpiaq qanoq annertutiginissaannik ilisimaneqanngitsunik aningaasaliissuteqarnerunissamik pisariaqartitsissasoq. Amerlanerussuteqartut piareersimapput pitsanngorsaatissatut kissaatigineqartut taakku aningaasalersornissaat siunertaralugu angallannermut tunngasunut aningaasaliissuteqarnerunissamat.

Tamanna tunngavigalugu amerlanerussuteqartut taamaalillugu Naalakkersuisut inassuteqaataat itigartippaat.

Ataatsimiititaliami ikinnerussuteqartup, Andreas Uldumip, inassuteqaatit akuerineqarnissaat kissaatigaa. Ikinnerussuteqartup tamatumunnga atatillugu uku oqaatigerusuppai (nutsernera):

”Ikinnerussuteqartut amerlanerussuteqartut angallanneq eqqarsaatigalugu isumaqatigiissutinik itigartitsinerat sakkortuumik illuatungilerpaat. Amerlanerussuteqartut taamatut aalajangermikkut nunatsinni tamarmi ilaasunik angallassineq immeraatigalugusooq pivaat itigartitsinerullu kingunereratarsinnaallugu nunatta ilarujussuata, taakkununga ilanngullugit nunaqarfiit tamarmik illoqarfiillu ilaasa 1. januar 2013-imiit umiarsuakkut timmisartukkulluunniit isumagineqarunnaarnissaat. Taamatut aalajangerneq tamatuma saniatigut sulifeqarfippassuarnik annaasaqarnermik kinguneqarsinnaavoq tassami naatsorsuutigisariaqaromat ilaatigut Air Greenland piffissami qaninnermi naatsorsuutigineqartumik sulisuminik soraarsitsiortulersinnaammat.

Kiffartuunneqarnissamik isumaqatigiissutissani nunatsinni sumiiffiit assigiinngitsut aqqaneqmarluk pineqarput. Naalakkersuisut sumiiffinni arfinilinni pitsaanerusequmik angalannikkut sullinneqalernissaaq siunnersuutigaat, sumiiffinni tallimani allannguuteqarani kiisalu sumiiffimmi ataatsimi (Ummannaq) ajorserialaarluni, allannguutituaralugu bilitsimut immikkut tapiissuteqartoqartarunnaarnissaa, nunap sinnerani atorneqalernaviannngitsumik atorneqarsimangitsumillu. Soorunami tamatigut pitsaanerusequmik kissaateqartoqartarsinnaavoq, kisiannili ikinnerussuteqartut pitsangorsaaniarnerit siunniunneqartut nuannaarutigaat.

Isumaqatigiissutissat tamarmik itigartinneqarnissaannik amerlanerussuteqartut aalajangernerat taamaallaat nunatta Kujataani angallannermik naammaginninnginnermik tunnga-veqartoq innuttaasut silarsuaannut piviusumut attuumassuteqanngilaq. Pissusiviusut imaap-put nunatta Kujataani piffissami siviisuunngortumik tamaani angallannikkut pissutsinik naammagittaalliutigineqartarlutik, taamatullu aamma pissusiviusoq unaalluni nunatta Kujataani innuttaasut ukiorpassuarni kissaateqartarsimammata qulimiguullit atorlugit angallasinerup saniatigut aamma imaatigut angalasinnaanerup periarfissinneqarnissaa. Innuttaasut kissaataat tamanna naammassineqarsimassagaluarpoq kiffartuunneqarnissamik isumaqatigi-issutissatut siunnersuutigineqartutigit. Taamaattorli amerlanerussuteqartut tamanna naag-gaarpaat peqatigitillugulu tamatumunnga naapertuutinniivissumik oqariartuutigalugu in-nuttaasut tamanna pillugu sukumiinerusumik oqaloqatigineqarsimasariaqaraluartut. Ataqa-tigittoqanngilaq.

Tamatuma saniatigut isumaqanngilluinnarpoq amerlanerussuteqartut ass. Tunu eqqarsaati-galugu angallanneq eqqarsaatigalugu isumaqatigiissutit itigartimmatigit nunatta Kujataani qulimiguulimmik allamik kissaateqarneq tunngavigalugu. Amerlanerussuteqartut tamanna pisariaqarsimassappat nunatta Kujataa eqqarsaatigalugu isumaqatigiissut itigartiinnarsima-sinnaagaluarpaat isumaqatigiissutillu allat akueralugit. Maannali tassa amerlanerussu-teqartut nunarput tamaat toqqusassippaallusoq, innuttaasut tiguarlugit amerlanerussu-teqartut namminneq nunatta Kujataa eqqarsaatigalugu piunasaqaataat naammassinierlugu.

Amerlanerussuteqartut angallanneq eqqarsaatigalugu isumaqatigiissutit itigartinnissaannut tunngavilersuutaat imminnut ataqatigiinngilluinnarput.

Amerlanerussuteqartut isumaqarput ujaasisarneq annaassiniartarnerlu eqqarsaatigalugu upalungaarsimaneq (SAR) pillugu isumaqatigiissutissat nutaat angalannerlu eqqarsaatigalu-gu isumaqatigiissutissat matumani pineqartut imminnut ataqatigiittut. Ikinerussuteqartut eqqaasitsissutigissavaat SAR 100 procentimik naalagaaffiup suliassaqarfigimmagu Naala-gaaffiullu namminerluinnaq toqqarsinnaammagu tamatumani pisussaaffini qanoq naammas-siniarnerlugu. Tamannaluunniit pillugu naalagaaffik naalakkersuisunilluunniit isumaqatigi-issuteqartariaqanngilaq. Aatsaat uagut nunatsinniit taamatut upalungaarsimanermut peqata-aniarutta akileeqaataassuteqarniaruttalunniit naalakkersuisut naalagaaffiullu akornanni isu-maqatigiissuteqarnissaq pisariaqartussaavoq. Taamatut isumaqatigiissuteqartoqassappatr qularnanngilaq Air Greenland tassaassasoq taamatut upalungaarsimaneq pillugu naalagaaf-fimmik isumaqatigiissuteqartoq, isumaqatigiissumilu tamatumani Air Greenlandip qulimi-guulii S-61-it aamma Bell-212-it ilaatinneqarsinnaapput tamanna pillugu Aningaasaqarner-mut Ataatsimiititaliami amerlanerussuteqartut qanorluunniit isumaqaraluarpata. Taamaattu-mik isumaqatigiissutissatut siunnersuutit matumani pineqartut upalungaarsimanissarlu pis-susiviusut eqqarsaatigalugit immikkut ataqatigiinngillat (tamarmilli immikkut tamarmik pin-gaaruteqarlutik).

Amerlanerussuteqartut kiffartuussinissamut isumaqatigiissutit atuuttut Kujataani annertu-nerungaartumik suliffissaaleqisoqalernissaanik kinguneqarsinnaanerarlugit oqaatigisima-vaat. Eqqortoq tassaavoq Kujataani angallannermi marloqiusatut aqqissuussinissamik siunnersuutigineqartumi suliffiit 24,5-it pilersinneqassasut kiisalu suliffiit 32-it aamma 40-t akornanni atorunnaassasut siunnersuutigineqarmat. Tassa imaappoq suliffiit annertuner-paamik arfineq pingasut aamma 16-it akornanni annaaneqassasut. Taaneqartoq kingulleq soorunami ajuusaarnarpoq, ajorluinnartutulli taaneqarsinnaanngilaq. Kujataani marloqius-atut angallannermik aqqissuussineq eqaanneroqisumik malitseqartussaq soorunami annaa-saqarnermut naleqqiullugu suliffissanik suli amerlanerusunik pilersitsinermik kinguneqar-sinnaavoq. Amerlanerussuteqartut aalajangernerat Kujataani inunnik angallassinermut kif-fartuussinermut isumaqatigiissummut akisunerungaartumik akiliisusaanermik kingusin-nerusukkut pinngitsoorani kinguneqassaaq. Amerlanerussuteqartut tamanna isiginngitsuus-aarpaat naak innuttaasunut billetinut annertunerusumik akeqartitsinissamik imaluunniit pisortat aningaasartuutaannik qaffasinnerusunik naggataatigut kinguneqassasoq nalunngik-

*kaluarlugu. Pineqartut taakku marluk sumiiffinni allani suliffinnik annaasaqarnermik immi-
kinguneqarsinnaapput, tamannali aamma amerlanerussuteqartut isummersorfigisimann-
gilaat. Aammattaaq nunap immikkoortuini aalajangersimasuni suliffiit pisariaqanngitsut nu-
natta karsianit aningaasalersorneqartut attatiinnarnissaat kiffartuussinissamut isumaqatigi-
issutini siunertarineqanngilaq. Tamanna tapiiffigeqatigiinnermik taaneqartarpoq, piffissallu
ingerlanerani inuiaqatigiit pissakinnerulernerannik kinguneqartarluni.*

*Aningaasaqarnermut Ataatsimiititaliap suliffissarsiuussisarfitut ingerlatsinissani pisussaaf-
figinngilaa. Taamaattumik S-61-it atorunnaarpata Air Greenlandimi sulisut ataasiakkaat su-
lerissanersut Inatsisartunit akuleruffigineqarnissaat pillugu amerlanerussuteqartut isumaan-
nut ikinnerussuteqartut isumaqataanngillat, tamannalu Aningaasaqarnermut Ataatsimiitita-
liap aamma sunniuteqarfigisinnaanngilaa. Aningaasaqarnermut Ataatsimiititaliap aamma
Inatsisartut pingaarnertut killiliussat qulakkeerneqarnissaat isumagisassaraat, taamaalillu-
tillu inuiaqatigiit namminneq iliuuseqarnissamut periarfissaqassapput. Aningaasaqarneq
aallaavigalugu Aningaasaqarnermut Ataatsimiititaliap inuiaqatigiinni isiginiagassat pin-
gaarnerit isumaginissaat pisussaaffigaa. Taamaattumik aningaasaqarnermut inatsimmi pin-
gaarnerisuiinerit aamma aningaasaliissutit pitsaasumik malinneqarnissaasa qulakkeernis-
saannut aningaasarsiornikkut akisussaassuseqarnerup ingerlanneqarnissaa Aningaasaqar-
nermut Ataatsimiititaliap pisussaaffigaa. Akerlianilli Aningaasaqarnermut Ataatsimiititaliap
Angallannermut Ataatsimiititaliatut ingerlatsinissani, tamatumani teknikkut ilisimasat
pisariallit piginagit Kalaallit Nunaanni ingerlatseqatigiiffiit qulimiguulinnik qanoq ittunik
timmisartuussinissaasa aalajangernissaat pisussaaffiginngilaa, kiisalu ataatsimiititaliap
suliassarinnigilluinnarpaa aningaasaqarnitta ilungersunartorsiornerani pisortat aningaasa-
liissutaasa annertusinissaannut suliniuteqarnissaq.*

*Amerlanerussuteqartut angallannermi isumaqatigiissutit Kujataani billetit akii qaffasin-
nerulissasut isumaqarpata, ikinnerussuteqartut kaammattorpaat isumartik allannorteqqul-
lugu. Eqqortoq tassaavoq umiarsuarmik angalanissamut billetit ullumikkut qulimiguulimmik
angalanissamut billetiniit akikinnerungaalissasut. Tamanna nalinginnaasumik isertitalinnut
akisuunik billetisinissamut akissaqanngitsunut iluaqutaassaaq. Akerlianillu qulimiguulimmik
assartuussinermi angallaviit ilaanni akisooq qaffassaaq, tamannali ajunngilaq, tassami tu-
aviortumik imaluunniit allanit akiliunneqarlutik angalasut annertunerusumik akiliuteqarta-
lissammata, kisiannili tuaviunngitsut imaluunniit akissaqarpiannngitsut umiarsuarmik anga-
lanissamut periarfissaqassallutik. Aammali tamanna akikinnerulersinnaavoq, tassami Disko
Line inunnut piffissani akunnattuni imaluunniit sapaatit akunnerisa naanerini angalasin-
naasunut akikilliliissutinik atuutsitsilersinnaammat. Disko Line atorlugu umiarsuakkut an-
gallassisoqalernat ilaasut angallatinik mikisunit angallassinissamullu akuerisaanngitsunit
angallatinut isumannaannerusunut nuunneqarsinnaassapput. Nalunngilarpummi ullumikkut
timmisartuussinernup akisuallaarnera pissutigalugu, amerlasuut iluatsitsiniartartut immak-
kullu angalallutik.*

*Amerlanerussuteqartut oqaatigaat nunatta Kujataani imaatigut angallanneq siunniunneqar-
toq kissaatiginagu tamanna namminersortunut angallassisartunut ajoqutaasinnaammat. Ta-
manna aamma imatut inernilerneqarsinnaavoq amerlanerussuteqartut aamma isumaqartut
nunarput TAMAAT eqqarsaatigalugu angallannermut pisortat tapiissuteqartassanngivissut,
tamanna namminertortunik ajoqusiisinnaammat! Taamaalilluni amerlanerussuteqartut isu-
maat tunngaveqarsorinarpoq nunatta Kujataani "avataaneersunik" Disko Line-itut ittunik
sullissisoqarnissaa kissaatigineqanngitsoq. Ikinnerussuteqartut uparuassavaat Disko Line-ip
nunatta Kujataanut siunnersuutaani ilaatigut taqqavani angallassisareersunik suleqateqar-
nissaq tunngavigineqarmat!.*

*Naalackersuisut aningaasatigut killiliussat Inatsisartunit tamarmiusunit aningaasanut inat-
simmi immikkoortinneqarsimasut iluanni kiffartuunneqarnissamik nutaanik isumaqatigiissu-
tissanut siunnersuuteqarput. Amerlanerussuteqartut maanna paatsoorneqarsinnaanngitsumik
naalackersuisoqarfinnut pilersuisunullu oqariartuuteqarput aningaasatigut killiliussat iluan-
ni ingerlatsiniassanngitsut. Tamannalu Aningaasaqarnermut Ataatsimiititaliap Namminer-*

sorlutillu Oqartussat ataatsimut isigalugit tutsuiginassusiannik ajoqusiisussaavoq. Amerlanerussuteqartut aalajangernerat taamaalilluni kinguneqarsinnaavoq siunissami Namminer-sorlutik Oqartussat isumaqatigiissutigisartagassaasa akisunerulernerannik.

Amerlanerussuteqartut aalajangernerat taamaalilluni kinguneqarsinnaavoq ilaasunik angallassinermut pisortat aningaasartuuteqarnerulernerannik pisortat aningaasartuutaasa anikillisarneqarnissaannik anguniakkamut akerliulluinnartumik. Ikinerussuteqartut eqqaasit-sissutigissavaat Nunatta Aningaasaqarniarnera pillugu Siunnersuisoqatigiit naatsorsorni-kuummassuk ukiualunnguit ingerlaneranni pisortat aningaasaqarniarnerat isasoorluinnas-sangippat ukiumut milliardit ataatsit tikillugit pisariaqartitsissasugut. Amerlanerussu-teqartut aalajangernerat taamaalilluni aamma aningaasaqarnitta patajaallisarneqarnissaa-nik suliniarnermut aamma akerliuvoq, soorlu aamma tamanna Aningaasaqarnermut Naalak-kersuisoqarfiup akissutaani ersertoq.

Amerlanerussuteqartut taamatuttaaq oqaatigaat naatsorsuutigalugu Air Greenland allallu ullumikkut aqquatinut amigartoorfiusunut sullissinissamut akilerlugit tapiiffigineqartartut, suli aqquatinik taakkuninnga ingerlatsiinnassasut naak piffissap ilaanni kiffartuunneqarnissamik isumaqatigiissuteqartoqassanngikkaluartoq. Tamanna meerarpalupporluunniit tassami naatsorsuutigineqarsinnaanngimmat piumasarineqarsinnaananilu ingerlatseqatigiiffiit nam-minersortut suliassanik amigartooruteqarfiusunik isumaginneqqullugit. Ilanngullugu aamma eqqaamaneqassaaq aktiaateqarluni ingerlatseqatigiiffiup aqutsisui aktiaateqarluni ingerlat-seqatigiiffiit pillugit inatsisit naapertorlugit iliuuseqaqusaanngimmata ingerlatseqatigiiffiup aningaasaqarniarnikkut soqutigisaanik innarliisumik.

Taamaalilluni ikinnerussuteqartut ataatsimut isigalugu amerlanerussuteqartut itigartitsine-rat sakkortuumik illuatungilertariaqarpaat, tamanna annertuumik nunatsinni nunaqarfippas-suarnik illoqarfíillu ilaannik eqquisussaammat. Amerlanerussuteqartut aalajangernerata qularnanngitsumik kingunereriaannaavaa sumiiffippassuarni 1. januar 2012-imi aallartittu-mik pisortanit isumagineqartumik angalanissamut neqeroorutaarunnissaa. Tamatuma malit-sigissavaa inuit angallatiminnik ukiuunerani angalasariaqartalissammata inuunernik akeqarsinnaasumik. Demokraatinit innuttaasut inuunerannik immeraateqarneq sakkortuner-paamik illuatungilerparput.”

Inatsisartut Sanaartornermut Angallannermullu Ataatsimiititaliaat allakkiamik matuminnga suliamullu atatillugu paasissutissanik allanik ilisimatinneqarpoq. Aningaasaqarnermut Ataatsimiititaliap Naalakkersuisunut kaammattuutigaat angallanneq eqqarsaatigalugu kiffartuun-neqarnissamik isumaqatigiissutissanut nutaanut killiliussat piffissami aggersumi aalajangers-arneqarnissaannut Angallannermut Avatangiisinullu Ataatsimiititaliaq peqataateqqullugu.

Aningaasaqarnermut Ataatsimiititaliap aalajangernerera

Qulaani allassimasutut paasinnilluni Aningaasaqarnermut Ataatsimiititaliami amerlanerussu-teqartut inassuteqaat **itigartippaat**.

Aningaasaqarnermut Ataatsimiititaliaq sinnerlugu

Andreas Uldum
Siulittaasoq